

InScena
INT / ART
SINTÎ
LOCÂL
AGJÎ
GLOBÂL

*La tierce serie
 dai documentaris,
 cu la regjie di
 Dorino Minigutti,
 dedicate
 ai protagoniscj
 des arts
 performativis.*

*Spazi par cure de
 ARLeF
 Agjenzie Regionâl
 pe Lenghe Furlane*

Jessi zovins, jessi artiscj, jessi furlans, frisons, galês,Identitâts individuâls e coletivis, une lenghe minoritarie tant che simbul di apartignince a une comunitât che e je une vore piçule te globalizazion planetarie onivare. Il **documentari Int/Art**, diret dal regjist udinês Dorino Minigutti, fat di **Agherose srl** cul contribût de **ARLeF** e sostignût ancje dal Fonds Audiovisîfs F-VJ, al vûl stimolâ une riflession su la influence e sul rûl che la identitât linguistiche e culturâl a àn pai zovins creatîfs intes diversis disciplinis artistichis. Dopo dal sucès de prime serie dedicate ai protagoniscj de musiche e de seconde serie dedicate al mont des arts visivis, la tierce e je dedicate ai protagoniscj des arts performativis: teatri, danze contemporanie, performances, arts dal circ e la gaugarie. A son artiscj che a crein spetacui cu la vôs, cui moviments dal cuarp, che a doprin i struments dal circ o che a fasin spetacui di strade: Aida Talliente, regjiste e atore teatrâl; Federico Scridel, atôr; Martina Tavano, balarine e coreografe; Davide Perissutti, artist dal circ e Anna Gubiani, dramaturghe. Lis 5 pontadis a àn la durade di 13 minûts ognidune. La lenghe originâl e je il furlan, cun sottitui par talian. Su la RAI F-VJ, inte programazion in lenghe furlane, **domenie ai 21 di Avrîl, aes 10.50, Rai 3** (in repliche miercus ai 24 di Avrîl, aes 22.05, Rai 3 bis - canâl 103) e sarâ mandade in onde le **pontade dedicate a DAVIDE PERISSUTTI**, artist dal circ che al à imparât di bessôl la tecniche dal eculibrisim, de manipulazion dai ogjets e al è stât un dai pionîrs di ceste art intal mont furlan, dulà che al è stât bon di puartâ e di meti in vore dut ce che al à imparât tes scuelis ator pal mont.



Domenie ai 28 di Avrîl, aes 10.50, Rai 3, in repliche miercus il 1ⁿ di Mai, aes 22.05, Rai 3 bis - canâl 103) e larâ invezit in onde la **pontade** dedicate ae dramaturghe **ANNA GUBIANI**. In graciis di un voli critic e di une esperience decenâl di consulente artistiche, Anna e je simpri ae ricercje de cualitât e dal perfezionament di tescj, spetacui e programs teatrâi. Il proget di INT/ART al rapresente une produzion che, confermant l'estri creatîf e la alte professionalitât dai produtôrs independents furlans, la ARLeF e à sostignût par vie che al è un proget *glocal*, furlan pe lenghe veicolâr, ma internazionâl pai temis e pe puartade divulgative, duncje preseabil ancje fûr dal Friûl.

